

Di sciàvuru m'arricriu

Caminannu a l'appèdi strati-strati
sentu lu vuciàri e lu sparlittiu.
Lu fannu assittati fora l'anziani
'mmucca a iddi mancu a li cani.

Pàrlanu di chissu e di chiddu,
di 'ncrasciati, di corna,
di fuitini e di la crisi
ca nun s'arriva a fini misi.

Caminannu pi la via
la testa ti svara,
sentu lu sciàvuru di cucinatu
e resti allammicatu.

Sentiu sciàvuru di pisci fritti,
di sazizza arrustuta 'nta lu focu,
di pasta a fornu ggìa sfurnata,
di patati fritti e di carni 'mpanata.

Acchianannu, sentu sciàvuru
di milinciani fritti, di sardi arrustuti,

di pasta cu l'agliu e l'ogliu,
di carni arrustuta cu lu 'nzogliu.

Lu cchiù ardu e diliziusu
è chiddu di lu baccalà
anchi fattu cu tecchia di limiuni
cu lu sulu sciàvuru ti senti un liuni.

Unni ti trovi-trovi
è un forti richiamu
lu senti denzu e precisu
nni lu nasu ti resta 'ncisu.

Chistu è lu sciàvuru
di la fimmina, di carni
frisca e 'mprufumata,
pronta a èssiri assapurata.

Lu nasu avi l'uduratu supraffinu,
la fimmina la senti puru di luntanu.
Parica la tucassi, quasi avariù,
sentu lu so sciàvuru e m'arricriu.

2013 Giuseppe Cardella